

Annertuumik innarluutillit ikiorserneqartarnerat pillugu Namminersorlutik Oqartussat nalunaarutaat

Annertuumik innarluutillit ikiorserneqartarnerat pillugu Inatsisartut peqqussutaanni nr. 7-imi 3. november 1994-imeersumi § 3 imm. 2, § 5, § 8a, § 11, imm. 4 § 12, imm. 4 § 15, § 18 imm. 3, § 20 imm. 2, § 21 imm. 2, § 22 imm. 2, § 25 imm. 3 aamma § 25a imm. 2 naapertorlugit, kingullermik allanngortinneqartoq Inuit annertuumik innarluutillit ikiorserneqartarnerat pillugu Inatsisartut peqqussutaata allanngortinneqarnera pillugu Inatsisartut peqqussutaanni nr. 10-imi, 31. maj 2010-imeersumi tunngavigalugit makku aalajangersarneqarput:

Kapitali 1

Atuuffii aamma nassuiaatit

§ 1. Nalunaarutip matuma atuuffigai inuit annertuumik innarluutillit.

§ 2. Inuit annertuumik innarluutillit paasineqartussat tassaapput timimikkut eqqarsartaatsimikkulluunniit ajorunnaarsinneqarsinnaanngitsumik nappaateqarnertik, ajoqusersimasuunertik imaluunniit amigaateqarnertik pissutigalugu, piginnaasamikkut annertuumik annikillisaaffigineqarsimasut. Piumasaqaataavoq piginnaasat annertuumik annikillisisanerisa pilersissimassagaat annertuumik annaasaqarneq imaluunniit inuup ulluinnarni nalinginnaasumik inuuneqarnissaminut aammalu inuup innuttaaqataasut allat assigalugit inuiaqatigiinni peqataanissaanut periarfissaasa killilerneqarsimanerat.

Imm. 2. Timikkut imaluunniit eqqarsartaatsikkut nappaateqarneq, ajoqusersimaneq amigaateqarnerluunniit ajorunnaarsinneqarsinnaassanngilaq, inuup inuunermi sinnera tamaat timikkut imaluunniit eqqarsartaatsikkut, ajoqusernikkut amigaateqarnikkulluunniit nappaatini attatiinnassagaa ilimagineqartariaqarsimappat.

§ 3. Piginnaasat annertuumik annikillineqarsimasutut paasineqassapput inuup ajorunnaarsinneqarsinnaanngitsumik timikkut imaluunniit eqqarsartaatsikkut nappaateqarnini, ajoqusersimani imaluunniit amigaateqarnini pissutigalugit:

- 1) nammineq pisariaqartitani isumagisinnaanngippagit, assersuutigalugit timikkut eqqiluisaarneq, atisalersorneq, nerineq assigisaallu, imaluunniit
- 2) illup iluani silamilu nammineerluni angalasinnaanngippat, ilanngullugu niuertarfilerineq, allanut pulaarneq, nalinginnaasumik sukisaarsartunut peqataaneq assigisaalu ilanngullugit eqqarsaatigalugit, imaluunniit
- 3) inunnut allanut attaveqarsinnaanngippat.

Imm. 2. Annertuumik piginnaasat annikillisisanerit pilersimasinnaavoq inunnguuseralugit imaluunniit kingusinnerusukkut pilersunik timikkut ajorunnaarsinneqarsinnaanngitsunik nappaateqalerneq,

ajouserneq imaluunniit amigaateqarneq, assersuutigalugit tusilartuuneq tusaasinnaassutsilluunniit annikilleriansimamera, nukitsigut noqartoortarneq pissutigalugu nukinnik aqutsisinnaannginneq allatulluunniit nukillaarnerit, noqartarneq, oqalunniarnikkut ajornartorsiuteqarneq, timip pisataanik amigaateqarneq, uummatikkut/taqqatigut/tartukkut/-tingukkullu ajoquteqarnerup kingunerisai, gigteqarneq kiisalu kromosomitigut ajoquteqarneq.

Imm. 3. Piginnaasat annertuumik annikillinerat pilersimasinnaavoq inunnguuserisatut imaluunniit kingusinnerusukkut pilersumik ajorunnaarsinneqarsinnaanngitsumik tarnikkut nappaateqarnikkut, ajoqusernertigut imaluunniit amigaateqarnikkut assersuutigalugit nammineq silarsuaaqqamiittarneq, eqqarsartaatikkut ineriartoqqinnerup amigaataanera, eqqarsartaatikkut kinguarsimasuuneq, nappaatigalugu isummakkut avissimasutut ilineq.

Imm. 4. Piginnaasat killeqarnerat napparsimagallarnermik pissuteqarpat nalunaarut manna malillugu ikiorsiisoqarsinnaanngilaq.

§ 4. Napaatit, ajoqusernerit imaluunniit amigaatit, tamarmik immikkut annikinnerusumik piginnaasanik annikillisitsisuusinnaasut, tamarmik katillutik piginnaasatigut annertuumik annikillisitsisuusinnaapput, § 3, imm. 1-mi piumasarineqartut naammassineqarsimappata.

Imm. 2. Piffissami aalajangersimasumi napparsimanerit, ajoqusersimanerit imaluunniit amigaateqarnerit, piginnaasat annikillinerata tamakkiisumik missingersuusiorneqarneranut ilanngunneqassanngillat.

§ 5. Kommunalbestyrelsi aalajangiisnaavoq inuup peqqissutsimigut pissusaa annertuumik innarluutilittut paasinninnermut ilaatinneqassanersoq.

Imm. 2. Annertuumik innaarluuteqarnermik taaguutip nalilersorneqarnerani tunngavissatut nakorsat suliamut tunngatillugu paasissutissiisutaat pigineqassapput.

Imm. 3. Piginnaasat annertuumik annikillisimanerannut uppersarsaatit pigineqassapput aammalu pigineqassallutik timikkut tarnikkulluunniit nappaateqarnermik, ajoqusersimanermik amigaateqarnermilluunniit uppersarsaatit.

§ 6. Piginnaasat annertuumik annikinnerulersimanerat illuatungilerniarlugu iluaqusersuutinik ikiorsiisoqarsinnaavoq. Ikiorsiiniutigineqarsinnaasut tassaapput assigiinngitsutigut siunnersuisarneq, ilitersuisarneq, tapersersuisarneq, paaqqinnittarneq imaluunniit iluaqusersuutinik tunniussaqaarneq.

Kapitali 2

Iluaqusersuutitigut Ikiorsiissutit

Ikiorsiissutit

§ 7. Iluaqusersuutit annertuumik innarluutillip ulluinnarni inuuneranut oqilisaataasussat akuersissutigineqarsinnaapput.

Imm. 2. Iluaqusersuutit ajornanngippat atukkiussatut tunniunneqartassapput.

Imm. 3. Iluaqusersuutit pisiarineqarneranni ikiorsiissutit taamaallaat tunniunneqassapput innarluuteqanngitsut namminneq illumilu atugassamittut pisiarisartagaannut sanilliullugit aningaasartuutit annertuumik amerlanerussuteqarpata.

Imm. 4. Iluaqusersuutinut inoqutigiinni nalinginnaasuni nalinginnaasumik atorineqartartunut akuersissuteqartoqarsinnaanngilaq.

§ 8. Iluaqusersuutit timip pisataanut iloqissersimasunut amigaataasunulluunniit ornavaffiusut, qerattaqqusersuutaasut iluarsiissutaasulluunniit nalunaarut manna malillugu

akuersissutigineqarsinnaanngillat.

Imm. 2. Taamaallaat pissutsini immikkut illuinnartuni napparsimmavinni peqqinnissaqarfulluunniit paaqqutarinniffini uninngasunut timikkut iluaqusersuutini akuersissuteqartoqarsinnaavoq.

§ 9. Pisortat ilinniarfiini ilinniartitsinermini inuit annertuumik innarluutillit peqataanerannut iluaqusersuutini nalinginnaasunik atugassanngortitsineranut nalunaarut manna tunngavigalugu akuersissuteqartoqarsinnaanngilaq.

§ 10. Iluaqusersuutit siunnersuisup suliamik immikkut ilisimasaqartup sapinngisaq naapertorlugu siumoortumik inassuteqarneratigut akuersissutigineqartassapput.

§ 11. Iluaqusersuutit §§ 7-10 malillugu atugassiissutigineqarsimasut iluarsartinnerannut aserfallatsaalineqarnerannullu akiliussisoqarsinnaavoq, iluaqusersuutit atorneqarsinnaanerisa iluarsaanissaq aserfallatsaaliinissarlu pisariaqartippassuk.

Imm. 2. Kommunalbestyrelsip pissutsini ataasiakkaani tamani nalilersortassavaa iluaqusersuutit taarserneqarnissaat imminut akilersinnaanerunersoq.

Annertunerusumik aningaasartuutit

§ 12. Inuk annertuumik innarluutilikinnarluuteqarnermini pissuteqartumik annertunerusumik aningaasartuuteqartarpat, annertunerusumik aningaasartuutaanerusunut taakkununnga aningaasatigut ikiorsiisoqarsinnaavoq.

Imm. 2. Annertunerusumik aningaasartuuteqarnerit pilersinnaapput assersuutigalugu makkunatigut:

- 1) Angerlarsimaffimmut nutaanik pequtisinermini angerlarsimaffimmi atortussanik allanik pisinermini, atortussaq aalajangersimasoq akisuujusartorlu pisariaqavissuusimappat
- 2) Atisanik skuunillu pisinerni, innarluutigisap nassatarisaanik taakkua allanik sukkanerusumik aserfallatsinneqartarpat
- 3) Nerisassanik immikkoorutilinnik pisinerni, tamanna innarluuteqarnerup pisariaqartippagu, assersuutigalugu sapigaqartuuneq
- 4) Errorsinermini immikkut aningaasartuutitut
- 5) Paaqqinninninermini aamma eqqiluisaarnerni atortunik pisinerni, soorlu nangernik ataasiaannarlugit atortakkanik, nangernik quiffiusinnaasunik il.il., peqqinnissaqarfiup tunniuttagarinngisaannik.
- 6) Taxarnernut, najukkami angallassissutit atorsinnaasut allat pigineqanngippata.

Imm. 3. Aningaasartuuteqarneruneq naatsorsorneqassaaq nalinginnaasumik aningaasartuutit innarluuteqarnerlu pissutigalugu immikkut aningaasartuuteqarnerit assigiinngissutaat sapinngisamik naapertorlugit.

§ 13. Aningaasartuuteqarnerunertut taamaallat oqaatigineqarsinaapput, aningaasartuutaanersoq 500 kr.-nik annertuneruppat.

Imm. 2. Aningaasartuutit arlallit, katillutik 500 kr.-nik annertunerusut, matussuserlugit aningaasaliiffigineqarsinnaapput.

Imm. 3. Aningaasartuutit ingerlaavartut, ataatsimoorussamik qinnuteqaatigineqartut aningaasartamikkut 500 kr.-nit sinnerlugit amerlassuseqartut, matussuserneqarsinnaapput. Ukiumut aningaasartuutit 500 kr.-nit ataallugit annertussuseqartut aningaasaliiffigineqarsinnaanngillat.

Siunnersortitut ikiortit

§ 14. Inuk annertuumik innarluutilik pisariaqartitsinini naapertorlugu siunnersortitut ikiorteqarnissaminik pisinnaatitaaffeqarpoq.

Imm. 2. Pisariaqartitsineq naapertorlugu siunnersorteqarnissaq paasineqassaaq inuup annertuumik innarluutillip immikkut ittumik siunnersorneqarnissaminik pisariaqartitsineratut imaluunniit ilitersorneqarnissaminik, iluaqusersuutitut nalunaarummi maani pineqartunut sulisunik atorfeqartitanik suliaralugit naammassineqarsinnaanngitsunut tunngatillugu.

Inigisap aaqqissuunneqarnera

§ 15. Inuup annertuumik innarluutillipinigisani immikkuullarissumik aaqqissuunneqarnissaa pisariaqartipagu, tamatumunga ikiorsiissuteqartoqarsinnaavoq. Inigisap aaqqissuunneqarneranut ikiorsiisoqarsinnaavoq, inuk namminerisaminikk najugaqarpat, allat ilagalugit najugaqatigiiffimmi imaluunniit najugaqatigiiffimmi immikkut nakkutigisami, taamaaliornikkut inuk najugaqarfimmini imminut ikiorsinnaalersinnaappat.

Imm. 2. Inini attartortittakkani nalinginnaasumik atortulersuutitut ikiorsiissuteqartoqarsinnanngilaq.

§ 16. Inigisap aaqqissuuneranut ikiuinermi ilaatigut pineqarpoq inigisamut isertarfimmut tunngasut, ilaatigut silataani isaarissap tungaanut aaqqissuussinerit assigisaallu.

Imm. 2. Ikiorsiissuteqarnermi inigisamut atatillugu quiliorneq assigisaanilluunniit sananeq aamma ilaatinneqarsinnaapput, annertuumik innarluutilik atortunut ikiorsiissutitut inissiivigisinnaasaminik peqarnissaminik immikkut ittumik pisariaqartitsippat, assersuutigalugu qamutit motoorillit.

§ 17. Kommunalbestyrelsip nalilersussavaiallanngortitassat suut pisariaqarlunnartuunersut, allannortitsinermilu aningaasartuutit naatsorsuusiussallugit. Kommunalbestyrelsip pissarsiarissavai sanaartortitsinermi aamma ikuallattoornermi oqartussat allannguiniarnermut akuersissutaat, kiisalu aamma inissiamik piginnittup akuersissutaa.

Imm. 2. Suliap sularineqarnissaanut isumaqatigiissuteqarnerit kommunalbestyrelsip isumagissavai aammalu sularineqarnerini nakkutiginnittuussalluni.

Qamutit motorimik ingerlatillit

§ 18. Qamutit motoorillit, biilit ilanngunnagit, kommunalbestyrelsimit akuersissutigineqarsinnaapput annertuumik innarluutilik najugaqarfinni angallassissutitut tamanit ilaaffigineqarsinnaasunit tikkineqarsinnaanngitsuni, matumani aamma taxat eqqarsaatigalugit, najugaqarluniluunniit ulluinnarni angalasarpat.

Imm. 2. Pissutsit immikkut illuinnartut atuutsillugit qamutinik motoorilinnik akuersissuteqartoqarsinnaavoq, biilit ilanngunnagit, naak imm. 1-imi piumasaqaatit naammassineqarsimanngikkaluarpataluunniit.

§ 19. Qamutit motorimik ingerlatillit, kommunalbestyrelsimit akuersissutigineqarsimasut, kommunalbestyrelsimit sillimaserneqassapput. Inuk annertuumik innarluutilik angallassissummik aalajangersimasumik atuisutut nalunaarsorneqassaaq.

§ 20. Qamutit motoorimik ingerlatillit, matumani biilit ilanngullugit, allannortiterne-qarnissaannut akuersissuteqartoqarsinnaavoq annertuumik innarluutillip qamutit motoorillit taakku allannortiteqqaartinnagit atorsinnaanngippagit.

§ 21. Qamutitut motoorilimik ingerlatilinnut, matumani biilit ilanngunnagit, ingerlatsinermut aningaasartuutitut, soorlu sillimasiinermut, iluarsaassinermut aamma aserfallatsaaliinermut

tamakkiisumik ilaannakortumilluunniit matusissutissanik tapiissuteqartoqarsinnaavoq.

§ 22. Biilinu, innarluutilinnik atorneqarsinnaasunngortinneqarneranni ikiorsiiffigineqar-simasunut, ingerlatsinermi aningaasartuutinu, soorlu sillimmasierneru, iluarsaassinernu aamma aserfallatsaaliinernu aningaasartuutinu kommunalbestyrelsip tapiissuteqarnissaanu periarfissaqarpoq.

Angallassinermu aqqissuussineri

§ 23. Kommunalbestyrelsi inuit annertuumik innarluutillit angallanneqarnissaannu aqqissuussinermik pilersitsisinnaavoq, tamanna kommuunimi immikkut illuinnartumik pisariaqartinneqarpat.

Imm. 2. Angallassinermu aqqissuussinermu taamaattumut kommunalbestyrelsi biilimik atugassiisnaavoq. Taamanna aqqinneqarsinnaavoq peqqinnissaqarfiu namminersortu-milluunniit ingerlatsiviup suleqatiginerisigut.

Imm. 3. Taassuma saniatigut kommunalbestyrelsi inuup annertuumik innarluutillip taxamik ingerlanneqartarnissaanu aningaasatigut ikiuisnaavoq.

Inuit ikorfartortit

§ 24. Inuk annertuumik innarluutilik nammineq inigisamini, aamma ataatsimoorsussamik inissiami imaluunniit nakkutigineqarluni inissiami, imminu ikorsinnaajumalluni perorsaaneramik sulialimmik ikorfartorteqarnissamik pisariaqartitsisoq, sapaatip akunneranu nal. akunnerini aalajangersimasuni ikorfartortilerneqarsinnaavoq.

Imm. 2. Kommunimi inissiamik naleqquttumik allamik neqerooruteqartoqarsinnaanngippat, inuit annertuumik innarluutillit utoqqaat illuanni najugaqartut ikorfartorneqarnissamut tiiminik tunineqarsinnaapput.

§ 25. Inuup ikorfartortaasup inuup annertuumik innarluutillip tarnikkut, timikkut aammalu isumaginninnikkut ineriartorteqqinnissaa suliaassaraa.

Imm. 2. Inuup ikorfartortaasup inuup annertuumik innarluutillip ulluinnarni suliaasanik naammassisaqarsinnaalernissaa pimoorullugu ikorfartussavaa.

Imm. 3. Kommunalbestyrelsi annertuumik innarluutilik 18-it inorlugit ukioqarpat nammineersinnaatitaanngippalluunniit annertuumik innarluutilik, ikorfartortit ikiorti, immaqa aamma sulianut ilisimasalik, angajoqqaatut oqartussaassusilik nakkutiginnittorluunniit peqatigalugit ikorfartortip sulinermini atugassaamik iliuusissanu pilersaarusiussaaq. Iliuusissatut pilersaarusiaq minnerpaamik ukiup affakkaartumik pisariaqartitsineq naapertorlugu nalilersorneqarlunilu aqqiissuteqarfigineqartassaaq.

§ 26. Inuk ikorfartortaasoq kommunalbestyrelsimi atorfinitsinneqassaaq, taanna inummut ikorfartortimut sulisitsisutut inissisimasuummat.

Imm. 2. Kommunalbestyrelsip sapinngisamik inuit perorsaasutut ilinniarsimasut ikorfartortit atorfinitsittassavai. Tamanna periarfissaqanngippat, komunalbestyrelsip inuit suliamik ingerlatsinissaminut tunngavissalittut nalilerneqartut atorfinitsittassavai.

Imm. 3. Inuit ikorfartortit aningaasarsiaqartinneqassapput Kalaallit Nunaanni Namminersorlutik Oqartussat aammalu suliaasaqarfiu iluani kattuffiup isumaqatigiissuteqarsinnaatitaaffeqartup, inuup ikorfartortip inissisimaffianiittup, akornanni isumaqatigiissutit naapertorlugit.

§ 27. Inunnut annertuumik innarluutillinut ataasiakkaanut tamanut nal. akunneri ikorfartorneqarfiusussat amerlassusaat kommunalbestyrelsimi akuersissutigineqartassapput.

Imm. 2. Nal. akunneri ikorfartorneqarfusussat nalinginnaasumik qaammatini arfinilinni atuuttussatut tunniunneqartarput.

Nammineq angerlarsimaffimmi paaqqutarineqarneq

§ 28. Inuk annertuumik innarluutilik nammineq angerlarsimaffimmini najugaqarpat ulluinnarni paaqqutarineqarneranik isumaginnittoq aningaasarsiaqartinneqarsinnaavoq. Taamaattorli piumasarineqarpoq pineqartup taamaaliornermigut nalinginnaasumik isertitaqarnissani tamakkiisumik ilaannakortumilluunniit annaasimassagaa.

Imm. 2. Nammineq meerasisamik paarsinermut taamaallaat aningaasarsiaqartitsisoqarsinnaavoq ulluunerani paaqqinniffimmi paarsineq periarfissatut naleqquttuunngippat.

Imm. 3. Nal. akunneri qassit aningaasarsiaqarfussanersut kommunalbestyrelsip naliliiffigisassavaa.

Imm. 4. Aningaasartuutit SIK-p isumaqatigiissutai malillugit suliamik ilinniagaqanngitsup nal. akunnermusiaatut minnerpaatut amerlassuseqassapput.

Oqilisaassineq

§ 29. Inuk annertuumik innarluutilik nammineq angerlarsimaffimmini najugaqarpat, paaqqutarineqarneralu ilaqutariinnut annertuumik suliaaqqartitsineruppat tamatuma oqilisaassivigineqarnissaa kommunalbestyrelsip akuersissutigisinnaavaa.

Imm. 2. Aatsaat oqilisaassinissaq akuersissutigineqarsinnaavoq tamanna ilaqutariit annertuumik innarluutilimmik siunissami paaqqutarinnissinnaaginnarnissaannut tunngaviuppat.

Imm. 3. Aammattaaq oqilisaassinermut akuersissuteqartoqarsinnaavoq annertuumik innarluutilik angerlarsimaffimmi avataani najugaqarallarnissamik pisariaqartitsippat.

§ 30. Oqilisaassineq ilaqutariinni allani, ulloq unnuarlu paaqqinniffimmi allamiluunniit taamaaliornissamut naleqquttumi najugaqarallarnikkut pisinnaavoq.

§ 31. Najugaqarnermi atugassarititaasut pillugit kommunalbestyrelsit oqilisaassiviusorlu allaganngorlugu isumaqatigiissuteqassapput.

Imm. 2. Ilaqutariinnut oqilisaassisunut imaluunniit ulloq unnuarlu paaqqinnittarfirmut namminersortumik ingerlanneqartumut aningaasarsiaqartitsisoqarnissaa kommunalbestyrelsip akuersissutigisinnaavaa. Oqilisaassiffiusup nalaani aningaasarsiat inuup pilersorneqarneranut aningaasartuutitut ilaanngillat.

Imm. 3. Pilersorneqarnermut aningaasartuutit pineqartumut pilersuisussaataitaasumit pilersuisussaataitaasunilluunniit akilerneqartassapput.

Imm. 4. Inuk annertuumik innarluutilik aamma/imaluunniit angajoqqaatut oqartussaannermik pigisaqartoq imaluunniit angajoqqaatut oqartussaagallartoq, inuk annertuumik innarluutilik 18-it ataallugit ukioqarsimappat imaluunniit nammineersinnaassuseqanngippat, aamma ilaqutariit oqilisaassinermi najugaqarfii imaluunniit ulloq unnuarlu paaqqinnittarfik namminersorluni ingerlanneqartoq, pineqartup kommunimi najugaqarfiani kommunal-bestyrelsi suleqatigalugu, akunnerminni isumaqatigiissutigisavaat pilersorneqarneranut qanoq iliornikkut akiliisoqartassanersoq.

Imm. 5. Pisortanit pigineqartoq ulloq unnuarlu paaqqinnittarfik oqilisaasuuppat taamaallaat pilersuinermit akiliisoqassaaq, takuuk imm. 3.

§ 32. Akiliutit annertussusiat imatut aalajangerneqarput:

1) Pilersuineq

kr. 49,84 ulloq unnuarlu

2) Ilaqutariinnut oqilisaassinermi najugaqarfinnut akiliut

kr. 284,00 ulloq unnuarlu

3) Ulloq unnuarlu paaqqinnittarfinnut namminersortumik ingerlanneqartunut akiliut kr. 3.000,00 ulloq unnuarlu

Imm. 2. Imm. 1-mi akigititatut oqaatigineqartut atuutilerput 1. Januar 2011-mi. Akigititat aaqqiissuteqarfigineqartassapput Kalaallit Nunaanni Naatsorsueqqissaartarfiup pisisartut aningaasartuutaannut tunngaviusutut pisortatigoortumik nalunaarutaat tunngavigalugit. Atuisunut akigititanut naleqqersuutip pointinik pingasunik allanngorneratigut 3 %-imik iluarsineqartassaaq. Iluarsineq januarip aallaqqaataani siullermi tulliuuttumiit atuutilertassaaq, julip aallaqqaataani atuisunut akigititanut naleqqersuut tunngavigalugu.

Imm. 3. Aningaasat iluarsineqarsimasut ukiut tamaasa januarip aallaqqaataani Naalakkersuisunit tamanut saqqummiunneqartassapput.

Pikkorissartitsisarnertit

§ 33. Annertuumik innarluutilinnut, ilaqutaasunut, ikorfartortitut ikiortinut allanullu pikkorissarnernut peqataanissanut ikiorsiisoqarsinnaavoq, kommunalbestyrelsi isumaqarpat pikkorissartitsinermi peqataaneq annertuumik innarluutillip ulluinnarni inuuneranut pitsanngoriaataasinnaasoq.

§ 34. Pikkorissartitsinermit atatillugu ikiorsiissutinut pikkorissartitsinermit akiliutit, angalanermut pikkorissarnerullu nalaani najukkamut aningaasartuutit kiisalu sulinikkut isertitassaraluanut annaasanut tamakkiisumik ilaannakortumilluunniit taarsiissutit ilaatinneqarsinnaallutik.

Imm. 2. Sulinikkut isertitassaraluit annaasat uppersaasatissaqartinneqassapput.

Imm. 3. Sulinikkut isertitassaraluit annaasat annerpaafigissavaat PIP-mut isumaqatigiissutit malillugit ilinniarsimasutut atorfinitsititap aningaasarsiaasa minnerpaaffiat.

Ilinniagaqarnissamut aamma sulinermit iliuusissatut pilersaarussiaq

§ 35. Inuup annertuumik innarluutillip meeqqat atuarfianni atuarnini naammassigaangagu ilinniarnernup ingerlaqqinnissaanut aamma/imaluunniit sulinerup ingerlanneqarnissaanut, inuk annertuumik innarluuteqartoq aamma/imaluunniit angajoqqaatut oqartussaanermik pigisa-qartoq imaluunniit angajoqqaatut oqartussaagallartoq, inuk annertuumik innarluutilik 18-it ataallugit ukioqarsimappat imaluunniit nammineersinnaassuseqanngippat, suleqatigalugit kommunalbestyrelsip suliarissava ilinniagaqarnissamut aamma/imaluunniit suliamik ingerlataqarnissamut iliuusissatut pilersaarussiaq.

Imm. 2. Kommunalborgstyreliip iliuusissatut pilersaarussiaq suliaralugu aallartissavaa atuarnernup naammassinissaa kingusinnerpaamik qaammatinik sisamanik sioqqullugu.

Imm. 3. Iliuusissatut pilersaarussiaq naammasseriigaaq pigineqassaaq atuarnernup naammassineqarnerani ullormi atuarfusumi kingullerpaami.

Suliassaqaqtitsineq

§ 36. Inummut annertuumik innarluutilimmut, ilinniagaqarnissamik imaluunniit suliffissaqaqtitsinerup iluani sulinissamik neqeroorfigineqarsinnaanngitsumut, suliassamik tassunga naleqquttumik neqerooruteqarnissaa kommunalborgstyreliip isumagisinnaasariaqarpaa.

Imm. 2. Inuk annertuumik innarluutilik ulloq unnuarlu paaqqinnittarfimmi najugaqartuuppat naleqquttumik sammisassaqaqarnissaanut neqeroorutissaqaqarnissaa Naalakkersuisut sapinngisamik isumagissavaat.

§ 37. Sammisartaqitsineq ulluunerani sammisartaqitsivinni, nakkutigineqarluni sullivinni imaluunniit nakkutigineqarluni suliffinni ingerlanneqartassaaq.

§ 38. Inunnut annertuumik innarluutilinnut ulluunerani sammisartaqitsivinnik, aamma nakkutigineqartumik sullivinnik kommunalbestyrelsi pilersitsisinnaavoq.

Imm. 2. Nakkutigineqarluni sullivinnik, ulloq unnuarlu paaqqinnittarfinnut atasunik, Naalakkersuisut pilersitsisinnaapput.

Imm. 3. Ulluunerani sammisartaqitsiviit, nakkutigineqarlunilu sulliviit sammisassanik ineriartuutaasunik katsorsaataasunillu neqerooruteqartassapput.

Imm. 4. Nakkutigineqarluni sulliviit aqqissuunneqarsimassapput inuit annertuumik innarluutillit maskiinanik akuutissanillu navianarsinnaasunik imaluunniit allanik ajoqusiinnaasunik atuissaminut periarfissaqarfigingisaannik.

Imm. 5. Annertuumik innarluutilinnut nakkutigineqarluni sullivinni sammisartaqutunut imaluunniit nakkutigineqarluni suliffimmi sulisunut sammisartaqitsinermut aningaasarsianik aningaasarsitsisoqarsinnaavoq.

Imm. 6. Aningaasarsiat annertussusissaat aalajangerneqarpoq nal. akunneranut 15 kr.-ssasoq.

Najugaqatigiiffik

§ 39. Inuit annertuumik innarluutillit 18-it sinnerlugit ukiullit, ulluinnarni ikorfartorneqar-nissaminnik pisariaqartitsisut, kisiannili imminnut ima ikiorsinnaatigisut perorsaanikkut ulluinnarnilu suliassatigut ikiorneqarnissaminnik pisariaqartitsinerat killeqarluni, piginnaasamilli annertuumik annikillisimanerat pissutigalugu imminerisaminnik najugaqarsinnaanngitsut, najugaqatigiiffinni inissaannik neqeroorfigineqassapput.

Imm. 2. Najugaqatigiiffimmi inigisaq sapinngisamik pineqartup kommunimi najugaqarfianiittoq neqeroorutigineqassaaq, sapinngisamik pineqartup angerlarsimaffianut qaninnerpaami.

§ 40. Taakkunannga pisariaqartitsineq naapertorlugu kommunalbestyrelsi najugaqatigiiffinnik pilersitsissaaq.

Imm. 2. Naalakkersuisut kommunalbestyrelsi najugaqatigiiffilioqqullugu peqqusinnaavaa, maakku tunngavigalugit:

- 1) kommuni inunnut annertuumik innarluutilinnut 18-it sinnerlugit ukiulinnut marlunnut imaluunniit amerlanerusunut kommunitut najugaqarfuppat,
- 2) pineqartut ulluunerani namminneq najugarisaminni imminnut ikiorsinnaanngippata aamma
- 3) pineqartut imminnut ikioqatigiillutik ingerlatsisinnaappata.

§ 41. Najugaqatigiiffik najugaqartut namminerisamik angerlarsimaffiattut isigineqassaaq. Najugaqatigiiffik imatut aqqissuussaassaaq ineqartut tamarmik immikkut ineeraqassallutik, sapinngisamik namminneq perusuersartarfeqarlutillu uffarfeqarlutik.

Imm. 2. Ineqartut ataatsimoorussamik isersimaartarfeqarlutillu igaffeqassapput.

Nakkutigineqarluni najugaqarfik

§ 42. Inunnut 18-inik ukioqalereersimasunut annertuumik innarluutilinnut paaqqutarineqarnissamik ikorfartorneqarnissamillu najugaqatigiiffinni neqeroorutigineqarsinnaasut saniatigut annertunerusumik pisariaqartitsisunut aammalu ulloq unnuarlu ikorfartorneqarnissamik pisariaqartitsisutut naliliiffigisanut, nakkutigineqarluni najugaqarfimmi inissamik neqerooruteqartoqartassaaq.

Imm. 2. Nakkutigineqarluni najugaqarfimmi inigisaq sapinngisamik pineqartup kommu-nimi najugaqarfianiittoq neqeroorutigineqassaaq, sapinngisamik pineqartup angerlarsimaf-fianut qaninnerpaami.

§ 43. Taakkunannga pisariaqartitsineq naapertorlugu kommunalbestyrelsi nakkutigineqarluni najugaqarfinnik pilersitsissaaq.

Imm. 2. Naalakkersuisutkommunalbestyrelsi nakkutigineqarluni najugaqarflioqqullugu peqqusinnaavaa, kommuni inunnut annertuumik innarluutilinnut 18-it sinnerlugit ukiulinnut marlunnut imaluunniit amerlanerusunut, § 42 malillugu nakkutigineqarluni najugaqarfimmi inissaannik neqeroorfigineqartussanut, kommunitut najugaqarfiuppat.

§ 44. Nakkutigineqarluni najugaqarfik najugaqartut namminerisamik angerlarsimaffiattut isigineqassaaq. Najugaqarfik imatut aaqqissuussaassaaq ineqartut tamarmik immikkut ineeraqassallutik, sapinngisamik namminneq perusuersartarfeqarlutillu uffarfeqarlutik.

Imm. 2. Ineqartut ataatsimoorussamik isersimaartarfeqarlutillu igaffeqassapput.

Imm. 3. Ineqarfik aaqqissuussaassaaq paarsisunut sulisunut ineeralerlugu.

Inunnut annertuumik innarluutilinnut ulloq unnuarlu paaqqinnittarfiit

§ 45. Inuit annertuumik innarluutillit, nakkutigineqarluni najugaqarfinni paaqqutarineqarnissamik ikorfartorneqarnissamillu neqeroorutinit annertunerusumik pisariaqartitsisut, ulloq unnuarlu paaqqinnittarfimmi najugaqarnissaminnik neqeroorfigineqassapput.

Imm. 2. Inuit annertuumik innarluutillit ulloq unnuarlu paaqqinnittarfimmi najugaqarnerminni inuit annertuumik innarluutillit ataasiakkaat ikorfartorneqarnissaminnik paaqqutarineqarnissaminnillu pisariaqartitaat naammassineqartassapput.

§ 46. Inunnut annertuumik innarluutilinnut ulloq unnuarlu paaqqinnittarfinni inissat pisariaqartinneqartut pigineqarnersut Naalakkersuisut nakkutigissavaat.

Imm. 2. Inunnut annertuumik innarluutilinnut ulloq unnuarlu paaqqinnittarfiit pilersinneqarnerini Naalakkersuisut ataqatigiissitsisuullutillu ingerlatsisuussapput.

§ 47. Inunnut annertuumik innarluutilinnut ulloq unnuarlu paaqqinnittarfiit aaqqissugaanissaannut tunngatillugu aalajangersakkat atuuttut innersuussutigineqarput.

Kalaallit Nunaata avataani najugaqarneq

§ 48. Kalaallit Nunaanni najugaqarnissamut tunngatillugu periarfissat nungussimappata, Naalakkersuisut akuersissuteqarnerisigut Kalaallit Nunaata avataanut inissiisoqarsinnaavoq.

Imm. 2. Akuersissuteqarneqpissaaq kommunalbestyrelsip inassuteqarnera tunngavigalugu.

§ 49. Kalaallit Nunaata avataani inissiinerup ingerlatiinnarneqarnissaanut apeqqut kommunalbestyrelsimiit nalilersorneqartassaaq, pissutsit pisariaqartitsinerat malillugu akulikissusilimmik, kisiannili inissiinerup aallartinneraniit minnerpaamik qaammatit aqqaneq marluk qanngiunneranni, ingerlanneqartassallunilu inissiinerup attanneqarnerani. Tamatuma kingorna kommunalbestyrelsip minnerpaamik ukiumut ataasiarluni pineqartup Kalaallit Nunaannut uternissaanut periarfissat misissortassavai.

Imm. 2. Kalaallit Nunaanni inissiinissamut naleqquttumik periarfissaqartinnagu angerlartitsinissaq periarfissaqanngilaq.

Imm. 3. Angerlartitsinissaqsiqqullugu angerlartitsinissarlu minnerpaamik sap. akunnerinik 16-

niksioqqullugu iliuusissatut pilersaarusiaq piareersimassaaq. Iliuusissatut pilersaarusiaq angerlartitsinnginnermi Naalakkersuisunut oqaaseqarfigisassatut saqqummiunneqassaaq.

Tikeraarnermut atatillugu angalanerit pisunullu immikkut ittunut il.il. atatillugu angalanerit

§ 50. Inuk annertuumik innarluutilik innarluuteqarnini pissutigalugu nunagisami avataani najugaqartoq ukiumut ataasiarluni nunagisaminut feriarnissaminut ikiorserneqarsinnaavoq. Piumasaqaataavoq, pineqartoq nunagisamini naleqquttumik najugaqarfigisinnaasaminik neqeroorfigineqarsinnaannginnini pissutigalugu, nunagisami avataani najugaqartuussasoq aamma najugaqarneq pillugu kommunalbestyrelsi imaluunniit Naalakkersuisut aalajangiisuusimassasut.

Imm. 2. Ikiorssiissutit angalanermut najugaqarnermilu aningaasartuutitut tamakkiisumik ilaannakortumilluunniit matusissutissatut ikiorssiissutigineqassapput.

§ 51. Aammattaaq ikiorssiissutitut pisariaqartinneqartumik angallassisut angalaneritut najugaqarnerinullu aningaasartuutit ilaatinneqarsinnaapput. Angallassisut, innarluutilimmut ilaqutaanngitsut, ullormusiaat, angallassinermi aningaasarsiaat sulinermilu annaasarisinnaasanut taarsiissutit ikiorssiissutinik aamma akilernerqassapput.

Imm. 2. Inuk annertuumik innarluutilik Kalaallit Nunaata avataani najugaqarfigisamini sulisumit angallanneqarpat, sulisumik taarteqartitsinermi aningaasartuutit matussuserneqarsinnaapput.

Imm. 3. Inuup annertuumik innarluutillip angalanissamini kina angalaqatigissanerlugu sapinngisamik nammineerluni aalajangissavaa. Pineqartoq nammineerluni taamatuminnga aalajangiisinnaanngippat, kommunalbestyrelsi aalajangiissaaq. Tamanna ingerlanneqassaaq innarluutilik nammineq, angajoqqaatut oqartussaassuseqartoq innarluutilimmulluunniit angajoqqaatut oqartussaassuseqarallartoq, inuk annertuumik innarluutilik nammineer-sinnaajunnaarsitaasimappat, kiisalu pisariaqassappat paaqqinniffimmi sulisut suleqatigalugit.

§ 52. Angalanissaq inuit annertuumik innarluutillit sapinngisamik nammineerlutik aaqqissuuttassavaat, matumani ilanngullugu aalajangertassallugu angalaneq ukiup qanoq ilinerani pissanersoq. Ilaqutariinni pisut immikkut ittut/nalliuttorsiornerit annertuumik innarluutillip peqataaffigissallugit kissaatigisai ataqpineqassapput.

Imm. 2. Inuup innarluutillip angalanissani namminnerluni aaqqissuussinnaanngippagu, piffissat angalaffiusussat, innarluutilik nammineq, angajoqqaatut oqartussaassuseqartoq innarluutilimmulluunniit angajoqqaatut oqartussaassuseqarallartoq, paaqqinnittarfimmi sulisut aammalu annertuumik innarluutillip qanigisani tikeraagassai suleqatigalugit, kommunalbestyrelsip aalajangertassavai.

§ 53. Inuk annertuumik innarluutilik tikeraarluni angalanerminut atatillugu immikkut ikorfartorneqarnissaminik pisariaqartitsippat, matumani oqalutseqartitsineq ilanngullugu, qinnuteqaateqareennikkut kommunimi najugarisami kommunalbestyrelsi tamatumunnga ikiorssiissuteqarsinnaavoq.

Imm. 2. Inuit annertuumik innarluutillit Danmarkimiittut eqqarsaatigalugit inuk pineqartoq nammineq paaqqinnittarfimmiluunniit najugarisami sulisut tassaapput immikkut ikorfartuutissat pillugit qinnuteqaateqartussat. Qinnuteqaat taanna Kalaallit Nunaanni kommunimut najugaqarfimmut nassiunneqassaaq.

§ 54. Inuup annertuumik innarluutillip § 50 tunngavigalugu tikeraarsinnaatitaanini atorsinnaanngippagu tassunga taarsiullugu pineqartup qanigisatut ilaqutaa annertuumik innarluutilimmut pineqartumut tikeraarluni angalanerminut atatillugu aningaasar-tuutitut ikiorssiiffigineqarsinnaavoq

Imm. 2. Inuup annertuumik innarluutillip nammineersinnaassuseqartup qanigisamisut ilaquuttani kina tikeraartissatut kissaatiginerlugu sapinngisamik nammineerluni aalajangissavaa.

Imm. 3. Inuk pineqartoq 18-it inorlugit ukioqarpas angajoqqaatut oqartussaassuseqartoq aalajangiissaaq. Inuk pineqartoq nammineersinnaassusiagaasimappat angajoqqaatut oqartussaassuseqarallartoq kommunalbestyrelsi suleqatigalugu aalajangiissaaq. Inuk annertuumik innarluutilik aalajangiinermi sapinngisamik annertunerpaamik nammineerluni peqataatinneqassaaq.

§ 55. Inuit annertuumik innarluutillit 18-it inorlugit ukiullit angajoqqaatut oqartussaassuseqartumut attaveqarnerisa ingerlaavartuunissaa siunertaralugu pisariaqarfisigut ukiumoortumik sulii ataasiarlutik tikeraarsinnaanissaat akuerineqarsinnaavoq. Taamaattorli angalaneq meeqqap katsorsarneqarneranut akornutaassanngilaq.

Imm. 2. Inuup annertuumik innarluutillip 18-it inorlugit ukiullip nammineerluni tamanna kissaatigippagu, angajoqqaatut oqartussaassuseqartumut pinnani qanigisatulli ilaquuttamut allamut tikeraarnissaa akuersissutigineqarsinnaavoq. Taamaattorli piumasarineqarpoq angajoqqaatut oqartussaassutsimik tigummisaqartup tamatumunnga isumaqataanissaa.

Imm. 3. Inuup annertuumik innarluutillip tamanna nammineerluni kissaatigippagu annertuumik innarluutillip tikeraarnissanut taarsiullugu angajoqqaatut oqartussaassuseqartoq qanigisatulluunniit ilaquutaasoq alla annertuumik innarluutilimmu tikeraassasoq akuersissu-tigineqarsinnaavoq. Taamaattorli piumasarineqarpoq angajoqqaatut oqartussaassutsimik tigummisaqartup tamatumunnga isumaqataanissaa.

§ 56. Inuk annertuumik innarluutilik 18-it inorlugit ukiulik paaqqinnittarfimmu allamut nuuppat pineqartup angalanermu periarfissaata aappaa angajoqqaatut oqartussaassuseqartup paaqqinniffimmu nutaamut tassunga tikeraarnissanut nuunneqarsinnaavoq.

§ 57. Angerlarsimaffigisatut najukkamut tikinniarneru ajornakusoortuunera, ikiorsiinissamut atortorissaruteqarnissamulluunniit periarfissat amigaatigineqarnerat pissutigalugit inuit annertuumik innarluutillit ilaquuttaminnut qaniginerpaasaminnut tikeraarsinnaanngippata, taarsiullugu angerlarsimaffigisatut najugarisap qanittuaniittumut illoqarfimmu pineqartup, angallassisut qanigisatullu ilaquutaanit ataatsip angalanissaat akuersissutigineqarsinnaavoq.

Imm. 2. Angalanermu ineqarnermullu aningaasartuutit tamakkiisumik ilaannakortumilluunniit ikiorsiissutigineqassappu. Aammattaaq angallassisut ilaquutaanngitsut eqqarsaatigalugit taakku ullormusiaat kiisalu angallassinermu aningaasarsiaqarsimappata aningaasarsiaat aamma sulinikkut isertitassaraluamikkut annaasaat ikiorsiissutitugut matussuserneqassappu.

§ 58. Pissutsit immikkut ittut atuutsillugit annertuumik innarluutillit § 50-mi pineqartunut ilaatinneqartut assersuutigalugu qanigisatut ilaquuttap napparsimarulunneranut, toquneranut ilisaanerannulluunniit atatillugu Kalaallit Nunaanni imaluunniit Kalaallit Nunaannut angalanissamut ikiorserneqarsinnaappu.

Imm. 2. Pissutsit immikkut illuinnartut atuutsillugit annertuumik innarluutillip § 50-mi pineqartunut ilaatinneqartup, qaniginerpaasaata angalanissaannut ikiorsiisoqarnissaa akuersissutigineqarsinnaavoq, assersuutigalugu innarluutillip pingaarutilimmik ullorsiorneranut imaluunniit napparsimarulunneranut atatillugu.

Imm. 3. Inuit § 50-mi pineqartunut ilaatinneqartut nunagisami avataaniitillutik toquppata illerfiisa angallanneqarnerinut aningaasartuutit tamakkiisumik ilaannakortumilluunniit matussutissaqartinneqarnissaat akuersissutigineqarsinnaavoq.

§ 59. Inuk annertuumik innarluutilik Kalaallit Nunaanni najugaqartoq aamma § 50-mi § 55-milu pineqartunut ilaatinneqanngitsoq nammineq akilikkaminik namminerlu suliniuteqarnermigut feriarpat, angallassisoqartinnani feriarsinnaanani, angallanneqarnissaanut ikiorsii-ssuteqartoqarnissaa akuersissutigineqarsinnaavoq.

Imm. 2. Angallassisoqarnermut aningaasartuutit makku tamakkiisumik ilaannakortumilluunniit akilerneqarnissaat akuersissutigineqarsinnaaput:

- 1) Angalanermut- najugaqarnermut aningaasartuutit
- 2) Ullormusiat
- 3) Angalaqataasumut aningaasarsiat
- 4) Sulinikkut isertitassaraluanik annaasaqaatit.

Imm. 3. Inuit annertuumik innarluutillit 18-inik taakkulunniit sinnerlugit ukioqartut aalajangersagaq manna tunngavigalugu taamaallaat ukiut pingasukkaarlugit ikiorserneqarsinnaapput.

Imm. 4. Inuit annertuumik innarluutillit 18-it inorlugit ukioqartut aalajangersagaq manna tunngavigalugu ukiut tamaasa ikiorserneqarsinnaapput.

§ 60. § 50, § 55, § 57 § 59-ilu tunngavigalugit tikeraarnermut feeriarluni angalanernut ikiorsiissuteqarneq sivisunerpaamik ullunik unnuanillu qulingiluanik sivissuseqartunut akuersissuteqartoqarsinnaavoq, piffissaq tikeraarnerup angalanerulluunniit ulluisa amerlassusii apeqqutaatinnagit. Feriarluni ulloq aallarfiusoq, kiisalu naggataa naatsorsuinermit ilanngunneqassanngillat.

Kapitali 3

Aqutsineq

§ 61. Kommunalbestyrelsip inuit annertuumik innarluutilillit siunnersorneqarneranni, ilitersorneqarneranni ikorfartorneqarnerannilu tapersersuisassaaq kiisalu ikiorsiissutissat suut neqeroorutigineqarsinnaaneriniik paasisitsiniaanerni ikiuisassalluni.

Imm. 2. Kommunalbestyrelsip nalilersussavaa atortutugit ikiorsiissutit suut aallartinneqarta-riaqarnerisut, inuit annertuumik innarluutillit sapinngisamik nalinginnaasumik inuuneqarneq qaninnerpaajullugu inuusinnaaqquullugit.

Imm. 3. Kommunalbestyrelsi inunntu annertuumik innarluutilinnut taamaallaat ikiorsiissuteqarsinnaavoq, inatsit alla tunngavigalugu ikiuisinnaanermut periarfissaqanngippat.

§ 62. Atortutugit ikiorsiissutit toqqarneqartassapput inuk annertuumik innarluutilik ikiorsiissutiniik tigusaqartussaq suleqatigalugu.

Imm. 2. Suliamik ingerlatsisup suliassaraa inuup annertuumik innarluutillip imaluunniit angajoqqaatut oqartussaassusillip imaluunniit angajoqqaatut oqartussaassuseqarallartup, inuk innarluutilik 18-it inorlugit ukioqarsimappat nammineersinnaajunnaarsinneqarsimappat, ilisimatinnissaat ikiorsiissuteqarnerup suna kingunerineraa aammalu toqqagassat suut piunersut, taamaalilluni pineqartup ikiorsiissutissat toqqarneqartut ilisimaniassammagit.

§ 63. Inummut annertuumik innarluutilimmut ikiorsiissuteqarnissamik kommunalbestyrelsimut qinnuteqaatit tamarmik paasisutissanik pineqartup aqqanik, najugaanik aamma cpr. nr.-anik imaqaassapput.

Imm. 2. Ersarissumik nalunaarutigineqassaaq ikiuinissaq qanoq ittoq qinnuteqaatigineqarnerisooq. Ikiorsiinissaq katsorsartinnerup ingerlaneranut ilaappat, taava iliuusissatut pilersaarusiaq suliarineqarsimasooq ilanngunneqassaaq.

Imm. 3. Qinnuteqaat aamma inuup innarluutaanut, piginnaassuseqarneranut, ilinniagaqarsimaneranut, inuussutissarsiutaanut kiisalu inuttut isumaginninnikkut atugaanut tunngasunik paasissutissanik imaqassaaq.

Kapitali 4

Kisitsisinngorlugit paasissutissat

§ 64. Kisitsisinngorlugit paasissutissanik il.il. paasissutissiineq kommunalbestyrelsip suliarissavaa.

Imm. 2. Kisitsisinngorlugit paasissutissat imaqarput qanoq ukioqarnermik, arnaanermik angutaanermilluunniit, sumi najugaqarnermik, qanga ilanngunneqarsimanermik, ikiorsiissu-tinik atuilerneramik, qanga akuersissuteqarsimanermik aamma akuersissutip atuuffiata sivisussusianik.

Imm. 3. Kisitsisitigut paasissutissat ataavartumik malinnaasinneqassapput Naalakkersuisunullu nassiunneqartassallutik ukiut tamaasa kingusinnerpaamik 1. marts.

Imm. 4. Naalakkersuisut imm. 3-mi kisitsisitigut paasissutissat nassiunneqartartut saniatigut sukkulluunniit kommunalbestyrelsi qinnuvigisinnaavaa kisitsisitigut paasissutissanik nassiusseqqullugu, tak. imm. 2.

Imm. 5. Naalakkersuisut imm. 2-mi taaneqartut saniatigut sukkulluunniit qinnutigisinnaavai kisitsisitigut paasissutissat allat.

Kapitali 5

Maalaaruteqarsinnaaneq

§ 65. Kommunalbestyrelsip aamma Naalakkersuisut nalunaarut manna malillugu aalajangiineri suliaasannngorteqqinneqarsinnaapput Isumaginninnermi Naammagittaalliuteqartarfimmut isumaginninnerup aqunneqarnera aaqqissugaaneralu pillugut inatsisartut peqqussutaani aalajangersakkat tunngavigalugit.

Kapitali 6

Atortuulersitsineq

§ 66. Nalunaarut manna 1. januar 2011 aallarnerfigalugu atortuulersinneqarpoq.

Imm. 2. Nalunaarut manna atuuppoq aningaasatigut atugassiissutitut imm. 1-imi ulloq taaneqartutut nalunaarutigineqartoq malillugu.

Imm. 3. Tamatumunnga peqatigitillugu Annertuumik innarluutillit ikiorserneqartarnerat pillugu Namminersornerullutik Oqartussat nalunaarutaat nr. 9, 4. april 2008-meersoq atorunnaarsinneqarpoq.

§ 67. Tikeraarluni angalanerit, feriarluni angalanerit aamma pisunut immikkut ittunut il.il. atatillugu angalanerit pillugit kapitali 2-mi aalajangersakkat aamma atuupput inunnut nalunaarutip matuma atortuulersinneqannginnerani Kalaallit Nunaanni isumaginninnermut oqartussaasunit Danmarkimi innarluutilittut isumagineqartussatut inissinneqarsimasunut, tamatumalu kingorna danskisut siusinaartumik pensionisiaqalersinneqarsimasunut.

Maliina Abelsen

/

Konny Olesen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut